




Literatura den Bon Dia

Ernesto E. Rosenstand



TUR COS A KEDA ATRAS

Su mundo a caba p'e. Esei tabata conta e momentonan ei. Su tragedia e tabata bibiendo na e momentonan ei. P'esei el a dal radio paga y a keda pensa leu. Na kico? E mes no tabata sa.

No tabatin sentido purba pensa den algo. Ki nodi tin di pensa ora realidad ta asina palpable cu bo por tene den bo man, sintie den bo venanan, les'e cu bo wowonan y por fin compronde cu un sinti cu na e momentonan aki tabata completamente fo'i sla. Y cu lo bo tabatin e siguransa cu lo bo no por trece ningun sorto di cambio.

E no tabata sa ki haci. E no tabata sa kiko e tabata experienciando e momentonan ei. Tabata un sentimento straño. Cu hamas den su bida el a yega di experencia. Den esei el a pensa cu e por a yama su mayornan, splica nan kico a pasa.

Nan lo por trece solucion pa su problema o sikiera consol'e. Na e momentonan ei t'esei e tabatin mester. Maske esei tampoco lo yuda di e hopi ei.

Y berdad el a tuma un curashi y a yama nan. Nan no por a kere loke nan tabata tende. Y mesora nan a dicidi di bai cerca dje. Nan a compronde den ki situacion nan yiu tabata. No a dura mucho cu nan tabata cerca dje pa mira con nan por a yud'e. Nan a sinti cu e tabata pa desespera.

Ora nan a drenta nan a hay'e sinta ainda cu e carta den su man. Apatico! Leu! Un homber destrosa. E tabata parce cu el a bira añanan mas bieu. E sla a kibr'e completamente. Anto asina di ripiente. E no tabata e Jacinto di antes. E tata a kita e carta fo'i dje y a lesa:

-Jacinto, pa ora bo lesa e carta aki lo mi ta hopi leu fo'i bo. Kisas lo bo no compronde. Mi a kere cu cerca bo mi por a haya felicidad, ma esei no tabata e caso.

Delaster tempo mi tabata fingi stima bo, ma mi no por a sigui cu e bida ei. No cu abo tin culpa, al contrario. Di bo mi no tin nada di keha. Mi naturalesa no tabata presta pa sigui e bida cu mi tabata hiba cu bo. Mi tabata desea algo mas.

Despues di e pensa hopi mi a dicidi di bai Colombia. No pensa di bin busca mi, mi no ta bai so. Mi a bai cu otro. Sperando haya cerca dje loke mi ta desea. Loke semper mi a anhela. Bo no conoc'e, ma esei no ta porta, nunca mi a conta bo di dje. Mi no a haci esaki prome, pasobra nunca mi a kere cu lo e nifica asina hopi p'ami.

Cu tempo el a drenta den mi bida, manera nunca mi por a imagina mi. Jacinto perdona mi y mi ta spera cu abo den futuro haya otro cu lo por haci bo mas felis cu ami a haci bo. Bo merece esei. Maske na e momentonan aki lo bo no kere mi. Ma di henter mi curason mi ta desea bo lo miho. Ayo!

Ora e tata a caba di lesa e carta e no por a kere loke el a caba di lesa y den su mes el a bisa:

- P... stinki!

El a bai cerca Jacinto y cu awa na wowo el a bis'e:

- Pordon'e mi yiu y lubid'e tambe, e no merece bo amor. Kisas asina ta miho.

Ora Jacinto a tende e palabranan aki el a reacciona. Manera un bestia herida el a lanta bira su lomba pa e tata y a bis'e:

- Pordon'e... por ta! Lubid'e, hamas! Mi a stima e mohe ei cu tur mi forza.

- Ta con e por a haci un cos asina?

- Ta ki motibo mi a dun'e pa e bai laga mi?

- Mi Dios ki motibo mi a dun'e? Y el a cuminsa yora manera un mucha chikito. Su mama cu na e momentonan ei por a compronde su tritesa a bai cerca dje y a bras'e. Y a palabranan di consuelo di su mama no por a calma su alma destrosa. Yorando e tabata sigui puntra:

- Pakico? Pakico?

Ma ningun hende por a dun'e contesta. E esun cu por a contest'e tabata awo na Barranquilla. Y sigur sigur cu nunca lo a bai contesta e pregunta aki.

27

Aki nan a keda tanten nan a haya un cas unda nan por a bai biba. Juan a pecura pa nan keda den un di e miho hotelnan cu tabatin na e stad. Su bentaha tabata cu e tabata conoce e stad hopi bon.

E tabatin custumber di bin aki pa asunto di negoshi. No tap or nada cu el a dicidi di bin e tad aki. No solamente cu e tabata conoce, ma e tabatin varios amigo aki. Y e tabata pecura pa complace cu Carmen den tur loke cu e tabata desea. E kier a pecura pa e haya did je un impresion. Asina Carmen lo no pensa mucho na Aruba. Cueste loke cueste e tabata evita Carmen haya nostalgia. Y den esei el a logra.

Carmen tabata busca tur manera pa laga Aruba atras. E tabata decidido pa cuminsa un bida nobo. No tap or nada el a dicidi di hui cu Juan bin Colombia. Prome dia tabata dianan di felicidad pa nan dos. Nan no tabatin ningun preocupacion. Tabata parce cu nan a cuminsa cu un etno luna dimiel. Nan tabata parce cu mundo tabata di nan. Nan tabata pecura pa gosa lo mas tanto posibel. Ningun di dos tabatin ningun sorto di compromise. Anochí nan tabata bishita diferente nightclub. Tabata conoci cu e stad aki tabatin masha hopi y den nan algun hopi bon. Y de bes en cuando un show. Esaki menos. Nan preferencia tabata bai unda nan por a balia. De bes en cuando nan tabata sa bai cine tambe.

Nan tabata parce un pareha cu a caba di casa. Y cu nan ta gosando nan honey-moon. Anto hacie de lo mehor posibel. E dianan aki tabata pasa bon mes, tur afo. Nada di keha. Carmen tabata hayando loke e tabata desea. Loke el a keda di haya. No ta esaki Juan a primintie? E no tabatin motibo pa tin duele di loke el a haci. E bida aki tabata completamente otro cu esun di Aruba.

Asina interesante! Asina otro! Asina dushi! Asina sin preocupacion. Carmen cu no a yega di sali di Aruba nunca tabata sintie den un mundo maraviyoso.